

## САРИН ГЕРЛД

### УХАЛЛГЪН

Ут хаалгъта сар  
Уулин ора герлткнӓ.  
Сала-салтр голмудас  
Сальки сержиньндж уланӓ.

Уулас гүүджӓх голин  
Урсхлнь хурдн, шуугата.  
Эргӓн угзрад цокад,  
Элӓх седклтӓ кевтӓ.

Букл сарин сарулд  
Буурл будн уньарта.  
Цевр агъарин дольгата,  
Цецгӓсин унр сонъсгдна.

Сар тӓгӓлсн оддуд  
Сарла герлӓрн дӓрлднӓ,  
Садмуд дунд халвгъ  
Сӓӓхн иньгӓн мактна...

Багъ цагин бӓӓдлм,  
Барваншгин хотн сангдна.  
Бембин герин газа  
Багъчуд цуглрснь ўзгднӓ.

Им сарта сӓӓд,  
Иньг седклӓн илткнӓ.  
Джигтӓ сӓӓхн дун,  
Дживр ургъдж делснӓ.

Ӗкӓр иньгм болналч.  
Ӗр цӓӓтл кӓтлнӓлч,  
Зуӓдн болад, хӓӓннь,  
Зурким минь зованалч.

Салин голин кӓвӓд,  
Сержиньсн сальки кӓдлнӓ.  
Седкл туссн иньгнь  
Санамр суудгим таслна.

Тегш тег уньартна,  
Теегин ӓмтн джиргънӓ.  
Тогърун шовун донъгъдна,  
Тоолврин икинъ тӓрӓлнӓ...

Буурл, Багъуд, Богшранъкн,  
Бембданъкн, Тӓркмӓд, Кӓвӓд  
Багъ цагин энъкр—  
Бӓгд тӓрскн газрмуд.

Энд ӓкчӓн, дӓӓгъӓн,  
Энъкр Дорджан, Дольгагъан  
Халун нулмсӓн асхдж,  
Хар газрт ӓглӓв.

Эн теегин ӓрд,  
Ээдж-ааван оршалав.  
Аав-ээджин кӓӓрд,  
Андгъар тӓвдж мӓрглӓв.